

春秋分記



詳校官監察御史_臣李陽棫

給事中_臣溫常綬覆勘

總校官原任中允臣王燕緒

校對官主簿臣汪日贊

謄錄監生臣張紹昂

欽定四庫全書

春秋分記卷四十四

宋程公說撰

書二十六

職官書第四

鄭

六卿

桓十七年傳以高渠彌為卿宣六年傳公子曼滿
欲為卿於時鄭止一卿也至襄二年傳子罕當國

子駟為政子國為司馬是為三卿始有三卿始有
當國為政司馬之別九年傳載鄭公子駢公子發
公子嘉公孫輒公孫薑公孫舍之是為六卿越明
年傳言子駟駢當國子國發為司馬子耳輒為司
空子孔嘉為司徒於是又有司空司徒之號雖以
子耳叙子孔上然司徒之制當上於司空顧所從
言異耳

襄十八年傳子驍伯有子張從鄭伯子孔子展子

西守此六卿也十九年殺子孔而子產始為卿或
謂子產為卿於十年盜殺發之時則非也二十七
年傳鄭伯享趙孟於垂隴子展伯有子西子產子
大叔二子石從二子石謂伯石公孫段子石印段
也昭三十年傳曰我先君簡公在楚襄二十九年我先
大夫印段實往敝邑之少卿也鄭多世卿公子黑
肱以二十二年卒而立段印段蓋已為少卿而公
孫段為卿則見於三十年傳言伯有既死始命伯

石為卿以年考之垂隴之享子展伯有子西子產

子大叔印段皆卿而伯石未為卿明矣二十九年經書公孫

段於年表辨之詳矣昭十六年六卿餞宣子子蘧子產子大

叔子游子旗子柳子產雖次子蘧而其下言子產

拜使五卿皆拜以見子產為政卿若傳所次則叙

事之文非班序也詳見鄭卿年表

當國

侯國政卿以司徒為上襄二年傳鄭成公卒於是

子罕當國子駟為政為政之名亦異矣又加以當國杜預謂當國者攝君事也禮君薨聽於冢宰不須攝行君事鄭以子罕當國者間於晉楚國家多難喪代之際或致傾危蓋成公顧命使之當國非常法也沈氏云魯襄四歲國家無虞今僖公年雖長大為偏於晉楚故令子罕當國沈氏但以晉楚之偏而言耳自後魯襄十年鄭簡公於是九歲則子駟子孔相繼當國至襄十九年傳又云子展當國

杜預亦謂簡公猶幼然是歲簡公蓋年十八矣國有君而臣曰當國汭而不革非也

政卿

鄭制首則當國之卿而政卿次之按襄二年傳子罕當國子駟為政子國為司馬子駟為政卿也而次於子罕至十年傳子駟當國子國為司馬不復言政卿豈當國兼之耶或司馬任之也十九年傳子展當國子西聽政若子罕子駟同時之制然自

是而下子產大叔駟歆相繼為上卿則曰為政不
復有當國矣當國惟在僖簡之世傳言子氏常掌
國政以為上卿襄二十九年則當國蓋猶掌政而權任
尤專有卿而當國則以為政貳之不然為政者斯
掌國政矣

冢宰

昭元年傳趙孟辭五獻之禮私於子產曰武請於
冢宰矣杜預注冢宰子皮以年考之罕虎自襄二

十九年代其父子展為政卿至是四年曰冢宰謂其為上卿也

司馬 司空 司徒 司寇

鄭上卿曰當國曰政卿若司馬等官則次之襄二年傳子罕當國子駟為政子國為司馬十年傳子駟當國子國為司馬子耳為司空子孔為司徒是司馬次政卿而司空司徒又次司馬也昭二年子產曰不速死司寇將至又十八年鄭火命司馬司

寇列居火道以防姦按侯國三卿司徒司馬司空
鄭有政卿又有司寇亦僭矣以司徒下於司馬司
空則班序又失之

少正

襄二十二年傳晉人徵朝於鄭鄭人使少正公孫
僑對杜預注少正鄭卿官孔穎達曰十九年傳云
立子產為卿知少正是鄭卿春秋時官名變改周
禮無此名按傳十九年子產既為少卿曰少正即

少卿也襄二十五年齊賂晉侯以宗器自六正五
吏三十帥皆有賂六正指三軍之六卿則春秋時
謂卿為正不特鄭也是時子展當國子西聽政皆
為上卿而子產為下卿故二十六年傳子產曰臣
之位少正在四則少正之與下卿義一而名二矣

辨攝卿之疑

襄二十九年經仲孫羯會晉荀盈鄭公孫段云云
城杞據經則公孫段於是列為卿矣而三十年傳

伯有死始命伯石為卿伯石即公孫段也前此未
為卿何以得書名氏杜預據傳於城杞下注曰蓋
以攝卿行孔穎達曰文七年傳稱晉使先蔑如秦
逆公子雍荀林父謂蔑曰攝卿以往可也何必子
是知有使大夫攝卿之法故以為證嘗考之經昭
二年書鄭殺其大夫公孫黑此亦以名氏書也其
在元年傳云公孫黑彊與於盟使大史書其名且
曰七子杜預注欲自同於六卿於時六卿謂罕虎

公孫僑公孫段印段游吉駟帶也黑不在六卿之數明年乃以卿書於經與公孫段書法同蓋鄭國於六卿外復有散卿春秋據事實書之苟謂為攝則何以書名氏哉

令正

襄二十六年傳子大叔為令正以請印董父更用子產辭乃獲杜預注主作辭令之正按三十一年傳鄭國將有諸侯之事子產使子羽多為辭令與

裨諶謀可否而告馮簡子使斷之事成乃授子大
叔使行之以應對賓客是以鮮有敗事而語亦云
為命裨諶草創之世叔討論之行人子羽修飾之
東里子產潤色之則子大叔主辭令潤色多出於
子產矣

執訊

文十七年傳鄭子家使執訊而與之書以告趙宣
子杜預注執訊通訊問之官